

Plontinas per la segirtad futura dil vitg

El territori cun lavineras dalla Val Clavianev sur Mustér vegn plantau 1500 plontinas da pégn en favur dalla regiuvinaziun digl uaul. Per quell'altezia ed en quella disposiziun dil terren ei il pégn aunc adina la plonta favorisada persuerter.

HANS HUONDER/FMR

L'jamna vargada e quest'jamna ei il Project uaul da muntogna engaschus a Mustér. «Igl ei il sisavel onn che nus luvrein ella Val Clavianev», di *Anna Schmidt*. La Tudestga ch'ei oriunda dil contuorn da Ravensburg ei engaschada sco menadra da project per quellas lavurs. Ella ei forestra e per la quarta ga en in engaschament a Mustér: «Quei ha secapescha igl avantag ch'jeu sai observar il svilup dalla lavur fatga ils onns avon, concretamein co las plontinas prospereschan.»

Duas jamnas da lavur

L'jamna vargada e quest'jamna ein en tut 25 voluntari(a)s s'engaschai egl uaul da muntogna dalla Val Clavianev che survecha era sco uaul da protecciun pil vitg da Clavianev e parts dil vitg da Mustér. Leutier ein vegni treis menaders da gruppa e la cuschniera. Agl ur dalla lavur el terren spundiv gaudan las participontas ed ils participonts che derivan surtut dalla Svizra, mo lu era dalla Germania ed ulteriuras tiaras dall'Europa, la casa forestala dil Tir. Leu han els dimora. En quellas duas jamnas vegn fatg terrassas el territori denter las lavineras. «Quellas ein necessarias per che nus sappien plantar bein las plontinas e ch'ellas hagian aschia in fundament stabil per lur svilup da crescer», di *Anna Schmidt*. Tut en tut vegn plantau uonn 1500 plontinas, gia ils tschun onns avon ei il medem diember mintgamai vegnius planaus. Ch'ins fa quei en quei territori sur plirs onns ora ha differents motivs: «Il principal ei segiramein ch'ei dat onns che las plontas prospereschan bein, auters onns meins. Sche nus plantassen tuttas il medem onn e havessen allura schliats onns da car-

schament, fuss bia lavur per nuot.» Las plontas du- ein surprendre in mument la funcziun dallas lavineras e proteger territori habitau e colligiaziuns da via e viafier da lavinias e bovas.

Pégn malgrad midada dil clima

Sco quei ch'il forester communal da Mustér, *Simon Cathomen* ha detg sin damonda dalla FMR, vegn il

pégn aunc adina preferius sin quell'altezia per la regiuvinaziun digl uaul: «Sin fundament dalla midada dil clima quintein nus che las temperaturas s'augmentien per dus entochen treis grads. En regiuns bassas ha il pégn difficultads igl avegnir, sin quella altezia cheu da strusch 2000 meters denton buca. Quei ei in'altezia ideala per siu avegnir.» Las plontinas che vegnan messas el territori ein vegni-

das tratgas el curtgin forestal cantunal a Rodels. Ils sems derivan digl Uaul Run, pia dil liug nua che las plontinas vegnan messas ussa. Ch'ins preferescha il pégn d'autras specias da plontas ha denton aunc in ulterior motiv: «Las plontinas da pégn ein buca aschi tschercadas dalla selvaschina, aschia ch'ellas pretendan era buca ulteriuras mesiras da protecciun», dian *Anna Schmidt* e *Simon Cathomen*. Il project sisum la Val Clavianev che havess en sesez giu da vegnir terminaus uonn, vegn prolunghius per dus onns. «Il motiv che nus savein buca terminar il project sco previu ei che nus havein buca survegniu il diember sufficient da plontinas dil curtgin cantunal. Aschia vegn il rest plantaus ils dus onns vegnents», di *Simon Cathomen*.

Glieud cumpleinamein motivada

Il forester communal ei fetg cuntents culla lavur che las gruppas dil Project uaul da muntogna prestan: «La gliעד ei fetg motivada. Uonn ei bia gliעד giuvna engaschada el project, quei croda en egl.» La vischnaunca indemnescha il project cun ina pauschala per plontina. Sper las terrassas per las plontinas e plantar quellas ei era vegniu erigiu ils davos onns polizists en quei territori. Quei ei construcziuns che protegian las plontas giuvnas. Las plontinas plantadas ils davos onns prospereschan dil reminent bein. «Quei ch'jeu hai saviu constatar catschan ellas oreifer. Sulet quellas digl onn vargau sentel jeu ch'ellas piteschan dalla sitgira da questa stad», constatescha *Anna Schmidt*. Mirau sul polisich ora vegn ina da 25 plontinas la fin finala ad esser enzacu carschida ora dil tut sco pégn: «Zatgeininas mieran, autras ston lu vegnir tagliadas pli tard per possibilitar ad autras da crescer bein.»



1500 plontinas da pégn vegnan plantadas quellas duas jamnas.

FOTO ANNA SCHMIDT